



आसामनि ग'लाघाट जिल्लानि बेन्दोडाव थानाय सरुपथारनि सरुपथार फरायसालिमानि नब्लांआव 29, 30 आरो 31 जुलाइ 2016 इंखालि सानथामनि हाबाफारि लानाने नेसनेल बुक ट्राष्ट, इण्डिया आरो बर' रेबग्रा जथुमआ जुथायै बानजाइनाय रावस्लायनायनि जरखा मावबादाआव बर' रावयै बे बिजाबखौ रावस्लायनाय जादोंमोन।

ISBN 978-81-237-8120-4

गिबि दिहुननाय : 2018 (शक 1939)

गुबै © रस्किन बांड

रावस्लाय © नेसनेल बुक ट्राष्ट, इण्डिया

Animals you can't forget (*English*)

Jai Junarkhow Nwng Baonw Haya (*Bodo*)

₹ 55.00

सामलाइगिरि, नेसनेल बुक ट्राष्ट, इण्डिया

नेहरू भवन, 5 इंस्टीट्यूशनल एरिया, फेज-II

वसंत कुंज, न्यु दिल्ली-110070 नि जोहै फोसावजानाय

www.nbtindia.gov.in



मोनसे गोजान खारनाय

खामसालिआव दाउआंनि उवां उवां गावनायाव आं सिरि मोनो, जायजों आबौवा मिथिनो हायोदि फुंनि जामुंनि सम जाबाय। बे समाव आं एमआव उन्दुनानै फैलाव अखोरांखौ नायदावबाय थादोंमोन। फुंनि सानदुंडा अबोला इनजुराव नांफैनो हमबायमोन। बेखौथ' आं मिथिखागौमोनदि, दिनै सानआ एंगारनो हायै सान आरो जेरै सोराडा ननि खथायाव नांफैयो अब्ला दाउआंआ गावनि उवां उवां गावनायखौ दोनथ'यो आरो आं गोसो खाडोदि दिनै जर'खायै खारनाय जागोन।


आं एमनिफ्राय सिखारनानै बायजोआव फैबाय। बिनि उनाव आं फिसा फिसा गब्लं गोनां लेखा बिलाइनि बाकसुखौ आलमारिनिफ्राय दिहुन्नानै लायो आरो महाराणीआ मोजाडै दडना गैया थाखोनखौ खेवनानै नायहरनायसै।

थामहिनबा महाराणीआ औवानि बैसाडाव उन्दुनानै दडमोन। आबौजों आंजों बिखौ मैखोमै खारनाय बादायलायनायनि थाखाय साखा-फारा जानो फोरोंदोंमोन। बेखायनो बियो उन्दुनानै दडमोन, मानोना बिहा मोनथाइ दडमोन। आं बिखौ फोजायाखैमोन। बाकसुखौ जोख्लोबनानै आं उनथिंजायनि दरजाजों ओंखारलानायसै। बै फुंनि समाव आंहा फरायसालिआव थानांगौमोन आरो आंखौ हाथाइ खाथिनि सोरखारि पार्कआव बेरायनायखौ आबैआ दा नुथों सान्नानै दडमोन। बियो बेबादि मैखोम खारनायखौ साबजा थारामोन।

जेब्ला आं बिबार बारियाव स'हैयो सान्दुंनि दुंनायजों बिलाइआव नानानै थानाय निहिरआ रानलानो हमबायमोन आरो आंनि आथिं सिडाव गुसु एबा गुरै गांसो दडमोन। बिबार बारिनि (पार्क) खना फारसे माखासे सेंग्रासा आरो सिख्लासा थुबुरै गसंनानै दडमोन। बिसोर जोबोर मिनि खुसियै रायज्जाय गासिनो दडमोन। बिसोरनि गेजेराव सानैसो गथ'आ आंखौबो खारनायाव बाहागो लानो थिनदोंमोन। बिसोरनि गेजेराव जिथाम बोसोर बैसोनि गुफुं रनबीर मुंनि गथ'बो दंफायोमोन। जाय गथ'आ गावहानो फोथायनाय दंसो गारोमोन आरो बियो गुरै आखुनिमोन।

रनबिरनि गोसोम गोसोम गाबनि रायन' बिफांआ बयनिबो थाखाय मुहिथावमोन। बे बिफांनि खर'आ गावनि बिगोमानि बायदि गेदेरथारमोन। बिनि मुडा ब्लेक प्रिन्समोन। अनिलनि बिफांनि महरा सरासन्त्रा फिसामोन नाथाय बिनि गुसथिनि दारिया जोबोर गोलावमोन। आंहा गोनो गोथो जानायसैदि बियो बिफां जौलैनि नडा नाथाय खोमोन गोनां जुनार फोलेरनि बादिसो आरो जायखो रोखोमसे फिसा एम्फौ मुसा होन्नानै बुडोमोन।

बेवहाय गुबुन गुबुन बादायारिफोरबो दंबावयोमोन। नाथाय बिसोरखौ रावखौबो देरहागोन बायदिखौनो नुवाखैमोन। बयनिबो नोजोरा ब्लेक प्रिन्स, मुसा आरो आंनि महाराणीनि सायाव दंमोन। जाय महोराणीआ दासिमबो आफेल फिथाईनि बेगर सिडावसो अन्दुनानै दडमोन। बिसोर फैसा खुसरा आरो कासनि थुखा लानानै सिरि सिरियै बादायखोमा लायगासिनो दंमोन। देरहागिरिआ मोनगोन बान्थाखौ दिनथिखानानै दोनदोंमोन। बियो मोनसे गिलुबालु गेदेर बिफांमोन आरो देरहागिरिआ बिखौ गाजा गोमजायै जोलै बांहोनो हागौमोन।



अनिलनि जाथोसे फिसा एमफौ मुसाआ गावनि बाकसुनिफ्राय ओंखारनानै खारलांबाय। बेवहाय बिहा जिंगासिनो गोनां जाबाय। बियो गांसो सिडाव एरसोनानै थादोंमोनब्लाबो नाथाय उनाव हमजाफिनो आरो बिनि उनाव बिखौ वाकसुआव सोनानै दोनफिननायसै।

खारनायनि लामाया जानोहागौ 6 फुट गोलावमोन। लामाया 6 इनसि गुवारमोन साखाथि फाखाथि कार्डबर्डनि बाथामफिसा लागायनाय जादोंमोन जाहाथे बादायगिरिफोरा सिगां एबा उनथिं जायल' खारनो हायो। खारनायनि सिगां बिसोरखौ कार्डबर्डनि आफाडाव थाहोनाय जादोंमोन आरो जेबोला खारनाया जागायजेनो अब्ला बर्डखौ बिसोरनि उनाव दोननाय जानांगौमोन। गुफुर-गोथां पायजामा गान्नाय सासे शिख दोहोरोमारी सेंग्रासाया बेखेवगरिनि बिबानखौ लादोंमोन आरो दावराव-दावसिया जोबागौमानि रेफारि सुबाय थायो आरो नेम-खानथिफोरखौ बुंधिनानै होयो। खारनाय समाव बिफांखौ दांनो मोनामोन। बिसोरखौ उनथिं जायनिफ्राय नारखोनोबो मोनामोन आरो खानाबादि नुनानैबो नुयैबादि खालामनोबो मोनामोन। खुगाजॉल' बाखोनायनानै बिसोरनि गोसोखौ दुंखांहोनो हानायमोन।


जाथोसे फिसा एमफौ मुसा आरो ब्लेक-प्रिन्सआ खारनो थाखाय थाक-थियारि जाबायमोन, नाथाय महाराणीआ आपेलनि बेगर सिनिफ्राय ओंखारनोनो लुबैथाराखैमोन। बिखौ आं बै जायगानिफ्राय दैखांनानै लाबोनो गोनां जाबाय आरो बिदिनो खारनायनि बै सारियाव दोनफैनो गोनां जाबाय। मुसा दारिआ गावजों बादयगिरिनि आथिडाव नांथानानै थानायसै। बिनिफ्राय आरो गोबाव जाबावनायसै। नाथाय बिखौ थाबैनो बोखारनानै गाव-गावनि जायगायाव थाहोफिननाय जाबाय। खारनाया जागायनोसैमोन।

अनिलआ उलथाफारसे गिदिंनानै ज'नानै दंमोन आरो जोबोर गोमजोर आरो गोसो होथाबनानै मुसाखौ नायलाय आरो जोबथा सिमाखौ नायहरलाय खालामबाय थादोंमोन। रनबीरआ हानथु खेरायनानै दद्रयै नायबाय थादोंमोन। नायगिरिफ्रा गोसो गुद गुद मोननानै सिरियै दडमोन। रेफारिखौ सुनानै होनाय जाबाय आरो खारनायखौ जागायजेनबाय। मुसा आरो ब्लेक प्रिन्सआ खारनो हमबाय नाथाय महाराणीआ दासिमबो बिन्दो सिमायावनो दडमोन। जानोहागौ बियो सान्दोंमोन दि बिनि आपेलनि बेगरआ बबेयाव थांखौ।

गासिबो खुसिजों गोब्राबै गोब्राबै आखाय खबदोंमोन। अनिलआ खेबले खेबले बाज्लादोंमोन आरो रनबीरआ गोदोना थेबगां थेबगां जालायनाय होसिखावदोंमोन। मुसाआ जोबोर गोसायै खारनो हमदोंमोन। ब्लेक प्रिन्सआ अब्लाबो गोहैलोयैनो दडमोने नाथाय लासै लासैयैब्लाबो खारबाय थादोंमोन आरो बे बादियैनो खारनायनि फिथाइया

माबा मोनसे जानो हाथावमोन। आं जोबोर रागा जोंदोंमोन। आबौजों महाराणीखौ जेरैबायदि खारनो फोरोंदोंमोन बेफोरखौ गासिबो फेलें जानाय बादिसो नुहरदोंमोन। दासिमहालागैबो बियो गोनो गोथोयैनो दडमोन आरो गावखौ आपेल सिंनिफ्राय दिहुन्नयनि थाखाय बोराबगासिनोसो दडमोन।

ओजोंहाय मुसाया जोबथा सिमा हांखोनि खाथियाव जानोहागौ नै फुट गोजानाव हरखाबै थाथ' हैबाय। बियो गावनि दारिनि थाखाय आख'फाख' मोनदोंमोन आरो बिखौ हजों नारखोलाय ओजों नारखोलाय खालामबाय थार्दोंमोन। ब्लेक प्रिन्सआ आगानसे-आगाननै दावगालांबाय थार्दोंमोन। अनिल आरो रनबीरआ जोबोर खुसि जादोंमोन। महाराणीनि थिंजाय जेबो नोजोरखौनो होयाखैमोन। बियो खाथि खालायाव थुबुर जानाय सुबुंफोरखो सन्देह'जों नायबाय थार्दोंमोन। बियो सानदोंमोन दि गावनि आपेलखौ सेनानै लांनाया बिसोरनिनो आखाइ थानो हागौ। आं बिखौ खुनुरुखुमैब्लाबो खारनो खावलायदोंमोन आरो गोसोखौ हमथाथाबनानै आं बिखौ नाज्रेर हरनाय जायाखिसै। आं बिखौ नाज्रेर हरोमोनब्ला बे समावनो जेन्नायनि फिथाइखौ होनो हागौमोन।



जेब्ला ब्लेक प्रिन्सआ मुसाजों समान स'हैयो अब्ला बिबो थाथ'नायसै आरो खारनायनि जोबथा सिमाया बबेसिम मोनलाय होन्नानै सौनायसै। अनिल आरो रनबीरआ बे समावबो होसिखाव होसिखाव गेलेग्रा बादायगिरिफोरखौ गोसो फुदुंनो गोसा गोसायै आखाइ खबनानै होदोंमोन। गावखौ आपेल बेगरनिफ्राय दिहुन्नानै लाबोनायनि थाखाय महाराणीआ रागाजोंनो गुबुन आदार नागिरनायनि असिलायै जोबोर गोख्रैयै सिगांथिं दावगालांदोंमोन।




रंजानायजोंनो आं होसिखावदोंमोन नाथाय जेब्लासिम बियो गुबुन बादायगिरि फोरनिसिम स'हैयाखैमोन अब्लासिम रावबो बिखौ नायसनाखैमोन। जेब्ला महाराणीआ थि समावनो सिमाहांखोखौ बारहैयो अब्ला गासिबो नायगिरिफ्रा सोमोनांजोबो।

गासिबो बै देरहासारनायखौ बाखोनायदोंमोन। अनिल आरो रनबीरआ गेलेनायनि भावथिनानै आंजों आखाइ हमलायनायसै आरो आंनि बिथोनबादियै मावनायखौ साबायखर होनायसै। बेखेवगिरिआ सुबुंफोरखौ सिरि खालामनो थाखाय रेफारि दामनायसै आरो आंनो बानथाखौ होनायसै। आंनि गोदान बिफांखौ अन्नाय नोजोरजों नायदोंमोन आरो बिनि गोब्रा बिखुडाव आखाइजों लासै लासै बिलिरदोंमोन। महाराणीआ जाहाथे गोसोआव दुखु मोना बेखायनो आं बिखौ आपेल सिडावनो दोनहरफिननायसै। अनिलआ बुंदोंमोन दि उननि खेब खारनायनि सिगां मुसानि दारिखौ इसे हास'नांगौ जेराव नाथाय रनबीरआ बुंदोंमोन दि, प्रिन्सआसो इसे हामखें जानायनि गोनांथि दड।

नआव फैनानै आबौनो आं मोन्नाय बानथाखौ दिनथिनायसै। अब्ला आबौआ बुंबाय, 'बियो जोबोर अनजाथाव आरो बिखौ फोरोंनो थाखाय आंहा माखासे मोनथोर दड। नाथाय जों महाराणीखौ नेवसिनो नाडा। बियो महाराणीनो थायसे जारौ आपेल फिथाइ होनायसै। बियो आपेलखौ आवग्रिनानै लानो थाखाय दसे समबो थाद'थाराखिसै।





मासे लामाखानदाइ : हेनरी

बे सल'आ जॉनि फिनानै दोननाय लामाखानदाइ हेनरीनि ।

लामाखानदाइआ गावनि मोनसे गुबुन रोखोमनि सिनायथि दड । आरो बिसोर गुबुन रोखोमनि मानबायग्रा जिबफोर बाइदि नडा । गावनि आलादा रोखोमनि गुन थानायनि थाखाय बिसोर खाथियाव थानाय माइनावनिखुइ आलादा सिनायथि लाखिदों । लामाखानदाइनि सालाइआ गावनि मोदोमजों समान गोलाव । बिनि मोदोमा फिसा आरो गोलाव आरो बिसोरनि आसिगुरआ बाथ'दाउनिजों गोरोबो । हेनरीनि खर'आव स'ना गाबनि गोमो गोमो हेलमेट थुफि गात्रायबादि नुनो मोनो ।

हेनरीनि मेगननि नोजोरा जोबोरैनो गोख्रोंथारमोन । बिनि महरा समायना नडामोन नाथाय मेगननि नोजोरा आगदानिफ्राय आगसिथिं जेरैबो नुहरनायमोन । बियो दाबसे जायगावनो थानानै मेगन फिदिंनानै जेरैथिंबो नायहरनो हानायमोन । खर'सायाव थानाय मेगन थाइनैया उन-सिगां, गोजौ-गाहाय जेथिंबो फिदिंजोबनो हायोमोन । बिनि बे महर-मुस्त्रिया हेनरीखौ गिथाव-बाथाव नुहोनायमोन । बिनि गिथाव-बाथाव मेगनफोरानो गिलु-बालु आरो बिषगोनां होत्रानै गुबुन मानसिफोरखौ सानहोयोमोन ।

सानसेखालि आबौआ सा भारतआव गावनि सासे लोगोखौ लोगो हमनो थांगासिनो दंमोन अब्ला बै समाव बिबार बागाननि हाबनाय गेटआव दावराव-दावसि जानाय सोदोब खोनादोंमोन । मानसिफ्रा अनथाइ खुबैयै खुबैयै आरो लौथिजों बुयै बुयै होस्त्रिखावदोंमोन । दावराव-दावसिनि जाहोना लामा खानदायसोमोन । जेराव बियो हाग्रा जायथुब सायाव थानानै सानदुं सायगासिनो दंमोन । सासे मानसिया बुंबायदि लामाखानदाइयालायनो नैजि फुट गोजान खुदै गारहरनानै बिष गारहरनो हायो । गामिनि मानसिफ्रा लावथि गन लानानै ज' जादोंमोन । आबौआ बे समावनो बै जायगायाव सौहैफ्लाडामोनब्ला बिनि जिउ जोबनाया थि थारमोन । आबौआ बिखौ नआव लाबोनायसै ।

बे लामाखानदाइखौ हेनरी मुं दोत्राय जानायसै आरो बे बादिनो बियो जोंजों थाफाफैनायसै ।

जेब्ला आं हेनरीखौ नुजेनदोंमोन अब्ला बियो आंजों जोबोर सांग्रायैसो खाथियाव साफिदोंमोन। आंनिथि उन खालामनानै बियो दोरोदनाय गैयाजासे दद्र द्रयै थागासिनो दंमोन। आंनिथिजायनि मेगना चार्ज लाइट बादि गिदिंबाय थादोंमोन, जेब्लासिमहालागै बियो आंखौ फोथायनो हायाखैमोन। आंनिथिजायनि मेगना जेब्ला थाथ'यो अब्ला गुबुन फारसेथिनि मेगना आरोबाव गिदिं बावयो। हेनरीआ गोबाव समसिमहालागै रावखौबौ फोथायाखैमोन। नाथाय बियो आंनि अन्नाय नोजोरजों नायनायखौ सन्देह'सो खालामदोंमोन।



बिनि सांग्रांयारि आखुआव आं मेंग्लिनानै बिनि मोदोमखौ लासैयै दांहरनो नाजादोंमोन । बेयाव आरो बियो रागासो जोंबावयो । बियो बुगानानै गिदिरसो जाबावदोंमोन आरो बिनि बिखायाव बार सोनानै बिनि महरा गोथानिफ्राय गोजासो जानो हमबावदोंमोन । बियो उननि आथिंजों गसंख्रानानै आंखौ सिगिनोसो नाजादोंमोन । खुगाखौ हां हां सिनानै रागाजों खुदै मुजु हरसिगौमोन । नाथाय बिनि रागाया बिनिफ्राय आरो बांसिन जानो हाल्ला । बियो रावखौबो अरफेराखै ।

बियो गिथाव-थावबो नडामोन । जेब्ला बियो जोबोर रागा जोंथारोमोन बे समावबो आडो आंनि आखाइ आसिखौ बिनि खुगायाव सोयो मोनब्लाबो लासैनो हगारफिनगौमोन । बिनि गोरा खखाबनि गोफार गोफार हाथाइआ समायफ्ले होसिनदोंमोन । नाथाय हेनरीआ मोनथिखागौमोन जानांगौ बिनि हाथाइया आदार जानायल'मोन । आखाइ आसिखौ अखुबनायनि थाखाय नडामोन ।

हेनरीआ एखनब्ला आंनि आखाइनिफ्राय आदार जानो गोसो जायोमोन । बियो गावनि सालाइखौ जुनथि बायदि बाहेरायाव गोलाव दिहुन्नानै एमफौफोरखौ हानहरनानै जायोमोन । अदेबानि बियो न'सिडाव जेबो दिगदार होयाखैमोन नाथाय साखाथिनि बिफां लाइफांफोराव थानाय फमफौ एनला फौरखौ थानोनो होयाखैमोन ।

जेब्ला बारिनि मैथ्रु फिथाइफोरा गोमोन जायो आबैया खादायाव लानानै नार्चारी स्कुलनि गाहाइ फोरोंगिरि गावनि बिलोगो मुस्त्रीमा घसनो हरोमोन । मैथ्रु फिथाइजों बुंफबनाय खादाखौ मालीआ लांनंगौमोन अब्ला हेनरीआ एमफौ नागिरनानै बेवहायनो एरसोनायसै । मालीआ खादाखौ दैखानानै थोंजों फरायसालिनि गाहाइ फोरोंगिरि मुस्त्रीमा घसनि मावख'आव दोन्नानै फैनायसै । फरायसालिनि सोरगिदिं गिदिंखानानै मुस्त्रीमा घसआ जेब्ला फैफिनो अब्ला मैथ्रु फिथाइखौ नुनानै जोबोर खुसि जानायसै आरो बेफोरखौ दाडै दाडै बोखारनो हमनायसै । थिक बे समावनो हेनरीआ बाहेरयाव बारनबोबाय ।

मुस्त्रीमा घसआ गिनायजोंनो होसिखावबाय । हेनरीआ मेगन थाइनैखौ फिदिंनानै बेखौ मोजाडै नायबाय थानायसै । हेनरीनि गाबआ गोथानिफ्राय गोमो आरो गोजासो जाहैबाय । बियो गावनि खुगाखौ ओरैबाइदि फुवारबायदि जेन'बा बियो गावबो होसिखावनोसो लुबैदों । बे समावनो लोगो फोरोंगिरिआ सिडाव खारबोबाय आरो लामा खान्दाइखौ नुनाय लोगो लोगो बिबो होसिखावबाय ।

हेनरीआ गिदोंमोन । बियो मावख'निफ्राय खामसालिथिं खारबोनानै आरो गुबुन मोनसे खथायाव हाबसो हैबाय । बियो गंसे डेकसआव मानखोहैनायसै । बिखौ डेकसाव मानखोनाय नुनानै फरायसाफ्रा ओजों-हजों खारनो हमबाय । माखासेया बिखौ हमनौ

आरो माखासेया रैखा खालामनो नाजादोंमोन । जोबथारनायाव हेनरीआ खिरखिजों बारनलांनायसै
आरो बारियाव श्रोब हाबहैनायसै ।

मुस्त्रीमा घसनिफ्राय आबैआ जाथायनि सोमोन्दै मिथिनो मोननायसै, नाथाय
आबैया बे लामाखानदाइयादि गावनिसोमोन बेखौ खिनथायाखैमोन । मानोना बेवहाय
गावजों गाव बोराबलायनाय एना-एनि फैगौमोन ।



जॉनि नआ फरायसालिनिफ्राय नख 'रथाम बारनानै गोजानाव थानायखाय आबौजों
आंजों लामा खानदाइया जॉनाव फैफिनगोनखौ मालाबाबो सानाखैमोन। नाथाय सात्रैसो
उनावनो बिखौ जॉनि बारियाव सान्दुं सायबाय थानायखौ आं नुसनगारनायसै। बियो
गावदि मोजां हाबा मावाखै बिखौ बियो जेबोखौनो मोन्दाडाखैमोन। नाथाय हेनरीआ
नैथि खेबनि थाखाय जेरावबो थांफिनाखिसै। हेनरीआ गावनि माखासे जिउखौ जॉनि
बारियावनो बाबेनलांहोनायसै आरो एमफौफोरनि बिबांखौ मालाबाबो बांनो होयाखिसै।





नख'राव दाउ' फेसा

गोजां बोथोरनि सानसे मोनाबिलि समाब सा-भारतनि देरादुनाव थानाय जॉनि ननि सिथलानि सिरिआव गुफुर समायना मासे दाउ' फेसा फिसाखौ आबौजों आंजों नुदोंमोन। जेब्ला आबौआ बिखौ हमदोंमोन अब्ला बियो गावनि गुनथुथ्रिजों कट कट सौनानै सोदोब होदोंमोन। नाथाय जेब्ला जों बिनो बेदर गोथां दौनानै दै लोंहोयो अब्ला बियो गोजोनै आंनि उन्दुग्रा बैसां सिङाव हाबनानै दलरै थाहैनायसै।

गुफुर समायना दाउ' फेसाया जाथोसे फिसा हारिनि दाउ'। बे रोखोमनि दाउ' फिसाया बोराइब्लाबो बारा देरनो हाया। नाथाय बै गिदिर जोलैनि दाउ' फेसाबादि महरा गाज्रि नडा। बिसोरनि जरासेखौ आं जॉनि बोराइ थाइजो बिफाङाव सम सम नुबाय थायोमोन आरो आं गोबां समाव दालाइखौ फिस्रिनानै बिसोरनि महर मोखांखौ नायजोबनो थाखाय नाजादोंमोन। दाउ फेसानि फिसाआ मोनानि आबुं दाउ' नडा आरो बिसोर सुबुं माहारिखौबो गिनो रोडा। नाथाय बिसोर साननि समाव न' सिंआव थानायखौसो साबजानाय मोनो। मानोना बिसोर बैफोर गिदिर दाउफोरखौ गिनांगौ जायो जायफोर बिसोरखौ गावसिनि सुथुर होत्रानै सानो।

बे दाउ' फेसाया आंनि बैसां सिंआवनो खुसियै थायोमोन। अखानायै थिक बे एखे जायगायावनो मासे गोदान दाउ' फेसाखौ नुनो मोनबावदोंमोन। अब्लानो जों नुसननायसैदि जॉनि सिथलानि गोजौआव थानाय गोलाव हासुंआव मोनसे दाउ' बासाआ थेर बेथेर जानानै दडमोन। बिनिफ्रायनो बे दाउ' फेसा फिसाया गोग्लैबोदोंमोन। बे दाउ' फेसा फिसाखौबो जों बै सिगांनि दाउ' फेसाजों दोनजाब हैनायसै आरो बिसोरनो आदार जाहोबाय थानायसै।

जेब्ला आं मोनायाव उन्दुनो थाङो, अब्ला बिसोर खिरखिनि ग्रिलाव बानानै दडमोन। हरगेजेरनि समाव बिसोरनि बिमाआ बिसोरखौ नुसननायसै आरो बायजोनिफ्राय अखा थंब्लेद दावराव-दावसि खालामबाय थादोंमोन। अखानायै फुङाव सिखारनानै आं नुबायदि खिरखिनि गाहायाव मासे एनजर गोथै दं आरो बेखौ बिसोरनि बिमाआनो

दोनलांदों। बिन फिसाखौदि आं आदार जाहोगासिनो दं बेखौ बियो मिथियाखैमोन
जानांगौ।



बे फिसा फिसा दाउ फेसाआ जॉनि नआवनो देरनो हमनायसै। जि (10) साननि उनाव आबौजों अंजों बिसोरखौ हगार हरनो थाखाय जॉनि बारियाव लांनायसै। मासेखौ आं थाइजौ दालाइयाव बाहोनानै दोनथ'गोदोंमोन आरो गुबुन मासेखौ दैखांनो थाखाय ग'दोंल'थारमोन। थिग बे समावनो सोरबा आंखौ उनथिंजायनि फ्राय खर' थेख्लाय फैबाय। लोगो लोगोनो बिसोरनि बिमा दाउ' फेसाआ आबौखौबो खेबनो हमनायसै। नाथाय आबैआ नुसननानै गोख्रैनो गावखौ रैखा खालामनो हादोंमोन।

आं गोख्रैनो गुबुन दाउ' फेसाखौ थाइजौ बिफाडाव दोनहरनायसै। बिनि उनाव रैखाथि मोननो जानगाराव थानानै आं नुहरनायसैदि दाउ' फेसा बिमाया गावनि फिसाफोरखौ लानानै दाबसे बारि खनायाव हाबहैबायमोन। जों सानबायमोनदि बिसोर माब्लाबाबो जॉनाव फैफिननाय नंलिया, नाथाय अखानायै फुडाव बै मानै दाउ' फेसाखौ जॉनि सिथलायाव थानाय जि लामग्रा दुरुंआव बानानै



थानायखौ नुनायसै। आबैनो खिन्थानो आं खारथारलांबाय। जेब्ला जों फैफिननानै नुयो अब्ला एसे खाथिआवनो दाउ' फेसा बिमायाबो बानानै दडमोन। बियो जोंखौ नुनानै हु हु होननानै अननाय रावजों बुंबाय जायजों जों मिथिनो हायोदि गावनि मैया गोरान्थि मावनाय हाबानि थाखाय निमाहासो बिदोंमोन।

आबैआ बुंनायसै, “दा नोंसिनि सेराव जेबो लुबैनाय गैयालासेनो दाउ' फेसा बिमाआ दंफैयो। बियो रोखा जाबायदि बे बिमाआ गावनि फिसाफोरखौ जों गेदेर गोलाव खालामनायखौ लुबैयो। मानोना दा बिसोर देरहांबायमोन आरो बिबो रोखा दि गावबो बिसोरखौ नांगौ बायदियै फेदेरनो-फोलावनो हानाय नंखायामोन।”

दा दाउ' फेसा फिसाफोरा जोंनि नख'रनि सोद्रोमा जाबाय। बिसोर बै नख'राव फिसिजाग्रा दाउफोर बायदिखायनो जोंनि आबैआ जोबोर साबजानाय मोन्दोंमोन। जों एखनब्ला एखनब्ला जिबौ, मोखा आरो दाउखाखौ फिदोंमोन नाथाय आबैआ बेफोरखौ सुखुनाय मोनामोन। नाथाय बियो फिसा फिसा दाउ'खौ जोबोर अनसोगारोमोन आरो बेखायनो बिसोरनो सबाय दालि दौयोमोन।



बैसोर फिसा फिसा दाउ' फेसाफोराबो आबौआ दौनाय सबाइ-दालिफोरखौ साबजानाय मोनलांबाय। दाउ फेसा फिसाफ्रा आबैजों औरैबाइदि गोमोन जाबायमोन दि बिनि गान्नाय पेटिगुटखौ नुब्लानो अन्नाय फावजों गांखौ बुब्राबबाय थायोमोन। मादै माबेलआ फैब्लाबो बिसोर रावखौबो गिलामोन। जेब्ला दाउ' फेसाआ मादैनि साखाथि फाखाथि थायोमोन अब्ला नाथाय मादैया गिनानै खारदिलाबायोमोन।

जोंदि बिसोरखौ फिसिदों बेखौ बावनानै जायनो पेन गानो बेखौनो बिसोर खेबनो नागिरोमोन। बेखायनो आबौआ एखनब्ला एखनब्ला बिसोरनो आदार दौनाय समाव पेटिकोटसो गानोमोन। आंबो माब्लाबा माब्लाबा बिसोरखौ खुसि लाखिनो थाखाय एप्रन (रोखोमसे खायलाब जि) सो गाननांगौ जायोमोन।

आबैया लेंहरोब्ला बिसोर मावजि बादि मेव होननानै गाबोमोन। नाथाय जेब्ला खाथि खालायाव हाग्रानि दाउ' फेसा फैयो अबला बिसोर हरफाथाल्ला दावराव खालामबाय थायोमोन।

बिसोर आबैनि जोंखोल माखोल साजायनानै दोननाय आइजेंफोराव बानानै गां बुब्राबबाय थानो मोजां मोनोमोन। जेब्ला बिसोरखौ जगजों दै गुसु लुनानै हैयो अब्ला आरोबाव बांसिनसो मोजां मोनबावनायमोन। बिसोर गासेबो सोलेरखौ फिनानै लानायमोन आरो बिनि उनाव रंजानानै आलनायाव थानानै थांहैयोमोन। बेयाव गावखौनो सानेर-सुनेर खालामनानै आरोबाव दैजों थुखैजानो फैफिननायमोन। एखनब्ला एखनब्लाथ' बिसोर खेबथाम गाहाम दुगैयोमोन। सानाव बिसोर थुफि दोनग्रा ष्टेण्डआवनो थाबाय थायो। मोनायाव बिसोर नआव उदाडै बेरायोमोन। बिसोरनि मोनानि खामानिया एम्फौफोरखौ जानायमोन जायनि थाखाय इंसिआनो बिसोरनि गुबै थावनिमोन। गावसोरनि मेगन गुनु आरो गोफार गुनथुथ्रि थानायलाय बिसोर मैहुर खालामनायाव आखा-फाखामोन।

उन्दै समनि बै बाश्राफोरखौ गोसो खाडोब्ला गोसोआव जाखां फैयोदि आबैया जेब्ला आराम सियाराव जिरायनानै थायोमोन अब्ला दाउ' फेसा फिसाफोरा आबैनि एप्रनआव बाथाबनानै थाफाबाय थायोमोन। सानसे खालि सानसु थिर समाव जेब्ला आं आबैनि खथायाव हाबहैयो आबैया उन्दुनानै दडमोन आरो बे समावनो मासे दाउ' फेसा फिसाआ आबैनि गान्दुखौ थक थक गुनथुथ्रिजों सौबाय थादोंमोन जेब्लासिमहालागै आबैया सिरिमोनाखैमोन। बिनि दान्दिसे उनावनो आबै आरो दाउ' फेसा फिसाजों उन्दुलानानै गरद लायबायसो।





ट'ट'नि मावनाय हाबा

सानसेखालि आबौआ टांगा सालायग्रानिफ्राय बा रां बेसेनआव ट'ट'खौ बायनानै लाबोदोंमोन। टांगा सालायग्राया बे फिसा मोखाखौ साराइ गिदिरनि दैयावसो खाबथानानै दोनोमोन। मोखाखौ जोबोर गोसो बायनायबादि नुनो मोनदोंमोन। आबौआ बिखौ नआव लाबोनो थि खालामनायसै, जेरावनोखि नख'राव फिनाय गोबां जुनारफोर दंखायोमोन।

ट'ट'आ नायनो समायना मोखामोन। बिनि जोंखोल मेगनाव सैताननि नोजोर थाबाय थायोमोन। आरो बियो गोबां समावनो गावनि मेगन मनिजों गुफुर हाथाइफोरखौ दिन्थिबाय थायोमोन। बिनि आखायफोरा ओरैबाइदि फोरगेव जालांबायमोनदि जेन'बा बियो गोबां बोसोर सानदुंआवनो थाबाय थायोमोन। नाथाय बिनि आसिफोरा गोरायैनो दड'मोन। लानजायाथ' बिनि मोनब्रै अखाफोरबादि समायनाथारमोन आरो बिनि लानजाइया थामथि आखाय बादिमोन। लानइजाइजों बयखौबो समायखायो होत्रानै आबौआ बुंदोंमोन। लानजाइखौ दालाइ बास्लायनायाव बाहायनाय जायोमोन आरो आखाइजों जेव्ला फिथाइफोरखौ मोनहासौवा अब्ला बियो लानजाइजोंनो बुज्रावहरोमोन।

जेव्ला आबौआ जायखि जाया जूनारखौ नआव लाबो जेनो अब्ला आबैआ जोबोर रागा जोडोमोन। बेखायनो आबैनि गोसोआ मोजां जायागौमानि आबौजों आंजों ट'ट'खौ दोनखोमानायखौनो थि खालामनायसै। जों बेखौ फिसा खथायाव दोनखोमाहैबाय। खथानि दरजाया आंनि उन्दुग्रा खथार्जोंनो गेवोमोन आरो जेबो आख'-फाख' होयालासिनो ट'ट'आ सिडनाव हाबलांनायसै।

इसे समनि उनाव आबौ आरो आं सानैजों ट'ट'आ माबोरै दड' बेखौ खौरां लानो थानाय जायो। अब्ला जों नुबाय दि आबौनि मोजां मोत्राय इनजुराव आलायनानै दोत्राय सावगारिफोरा जिफ्लेजोबनानै दड'मोन आरो इन्जुरनि प्लाष्टारफोरा गुगाजोबनानै दड'मोन। इनजुरजों थाफानाय खुन्थियाफोरा खुथु-खाथा जानानै दड'मोन आरो बेवहाय आलायनानै दोननाय आंनि गेलेग्रा गस्लाया खोन्दो-खोन्दो जिफ्लेनानै दड'मोन।

आबौनि मोखाया बे हाबाखौ खुसिसो मोनबाय। बियो बुंनायसै दि मोखाआ जोबोर सांग्रंथार। आरो सम मोनबावोमोनब्ला बियो नौनि जिफ्लेनाय क'ट गस्लाजौनो दुरुं बानायनानै खिरखिजौं बारनलांसिगौमोन।

बिनि उनाव ट'ट'खौ बारिआव बानायनानै दोनखानाय गन्द्रायाव दोनहैनायसै। बेहाय आबौनि गोबां फिसिनाय जुनारफोरबो दंबावोमोन। नाथाय मोखाया बैयावबो मोनानि समाव गावनि लोगोफोर थामहिनबा खासेव, सेसा आरो गराइखौबो उन्दुनोनो होवाखिसै।

जोबथारनायाव जेल्ला आबौआ ट'ट'खौ लाखिनो थाखाय राजि जायो अब्ला ट'ट'खौ गन्द्रायाव थानो थाखाय मोजां जायगा मोननायसै।

गोजां बोथोराव ट'ट'आ जोबोर मोजां मोनोमोन जेल्ला आबौआ बिखौ दै गुदुंजौं थुखैयोमोन। बुंजासे दै गोनां सारायाव दैआ बेसे गुदुं बेखौ आनजाद नायनो थाखाय ट'ट'आ गावनि आखायखौ सारायनि दैआव हरनायसै। बिनि उनाव बियो




लासै लासै दैआव गोजोमोमोन। सिगाडाव थोंसे आथिं आरो बिनि उनाव गुबुन थोंसेखौबो सारायनि दैआव हरनायसै। बिनि उनाव गासिबो सोलेरखौनो दैआव गोजोम होयो आरो बिनि खर'आल' बाहेरायाव थायोमोन। मोजाडै: गोजोमखांनयनि उनाव बियो साबोनखौ गासिबो मोदोमाव हुनानै लानायमोन। दैया जेब्ला गुसु जायो बियो सारायनिफ्राय ऑंखारनानै थोंजोंडै इसिं नआव हाबहैनानै गावनि मोदोमखौ अगदाव खाथियाव फोरानहैयोमोन। बै समाव सोरबाफोर बेखौ मिनियोबोला बियो जोबोर दुखु मोननायमोन आरो दुगैनो गोसोखौनो जायामोन।

सानसेखालि औरैबाइदि जाबाइदि साहा फुदुंनो लानाय डेकसिआ अगदावनो दडमोन। अब्ला ट'ट'आ जेबो खामानि मोनैआव डेकसिनि थाखोनखौ बोखारनो लाबायमोन। दैआ दुगैनो हानायबादि गुदुंमोन। बेखायनो बियो बे दैआव हाबसोमबाय। बाहेरायाव बिनि खर'खौल' नुनो मोननाय जादोंमोन। नाथाय दसे उनाव दैआ दुंखांनानै गौदौनो हमबाय। ट'ट'आ इसे सिखांबाय नाथाय बाहेरायाव गुसुद्रायखायल आरो



सिडाव हाबफिनबाय। दसे समहालागै बियो आथिं आखायजों बाब्राबबाय थाबाय।
जोबथारनायाव आबौआ फैनानै बिनि खामफ्रामजानाय देहाखौ बाहेरायाव दिहुनफैनायसै।
खर' मेलेमआव खालि बे बादिल' सैथान आखुखौ सानबाय थायोबोला ट'ट'नि
बे जाथाइआ जाबाय थागोन। आबैआबो सानबाय दि बे बाइदि
जुनारखौ जों लाखिबाय थानो हानाय नडा। जों आइजें-आइला,
जि-जोम, वाल-पेपार बाइदिनि खहा जाबाय थानायखौ सहायनानै



थानो हाया । नाथाय जों टांगा सालायग्रानोबो ट'ट'खौ हरफिननो सानाखैमोन । सानसेखालि जोंनि जेंनाया सुस्रां जाबाय । बै समाव जोंनाव सासे गेदेमा सुबुडा फैदोंमोन आरो बिथाडा बुंनायसै दि बिथानि मोजां मोखाखौ नागिरनानै फैदोंमोन ।

आबौआ बुंनायसै नाथाय बिखौ मोजांनि सोलाय गाजिसो बुंजायो ।

गेदेमा सुबुडा बुंनायसै-आंनि मोखाया जोबोर मोजांथारमोन । द' दाननि सिगां बिखौ सोरबा खावनानै लाबोदोंमोन । उनावहाय मिथिनो मोननायसैदि बियो हाथाय सालिआव सोरबा टांगा सालायग्रानाव दडनो । बिथाडा बुंनायसै दि - बे मोखाखौ आं गेदेमा मानसिनो फाननाय जादोंमोन जाय मानसिहा जुनारसालिबो दडमोन ।

सासेल' गेदेमा मानसि दडमोन बेनो जाबाय जोंनि आबौ ।

आबौआ अब्ला बुंनायसै औ आं हाथाइनिफ्राय मासे मोखा बायदोंमोन । दा नोंथांडा नायनो हागोन दि बे मोखाया नोंथानि नंमारगौना नंमारा ।

बे समावनो ट'ट'आ खामसालिआव नुजाफैबाय । बियो गेरुवा जि गाननाय गेदेमा सुबुंखौ नुनानै जोबोर खुसि जानायसै ।

बिनि उनाव बियो बिनि फाफिलियाव बारखो हैनायसै । मा बियो नोंथानिनो मोखोमोन नामा होन्नानै आबौआ अब्ला सोंबाय आरो बिदिब्ला बियो मोजां मारमोन नामा ? आं सोंबाय, आं सानबाय थादोंमोनदि सोरबा सैथान गथ'आबो मोजां जानो हायोना ?

गेदेमा सुबुडा अब्ला बुंनायसै, औ बियो जोबोर मोजां ।

आबौआ अब्ला बुंबाय, नोंथाडा बेखौ लांफिननो हासिगौ ।

आबौआ बेखौ लुबैदोंमोन दि ट'ट'नि सोलाय बा रां मोनफिननायखौ । नाथाय जाबायमा, बियो उलथासो बा रां हरदेरबावनांबाय । गेदेमा सुबुडा जोंनो बोर सारस्रि लांबाय । आं ट'ट'नो थालिर फिथाय जाहोनायसै आरो बिबो आंखौ अन्नाय नोजोरजों नायबाय थानायसै । बे बादिनो आबौआ जालानिफ्राय बारग'नायसै ।





गं गोनां बोरमा फानथि

आबौनि नआव गोबां रोखोमनि जुनारफोर दडमोनब्लाबो सानसेखालि बेसर बारिनिफ्राय आंनि उन उन फैफानाय गोसोम बोरमा फानथिखौसो साबसिनै मोनदोंमोन ।


जेब्ला बोसोरफ्रामबो दैज्जांडाव अखा हानायाव फिसा दैसायाबो स्राय स्राय बोहैनो हमो अब्ला आं दैमाखौ बारलानानै बेसर आबादनि गेजेर गेजेर बेरायै बेरायै साहा बागानाव साहा बिलाइ खानाय सिख्लाफोरखौ नायखोमायोमोन ।

सानसेखालि दंग जाम्फैनि हब्रु बारियाव माखासे दाउब'फोरखौ ना हमबाय थानाय नुदोंमोन । बे समावनो आंनि आखानथियाव माबा नांथानाय बादि मोनो । खाथियाव नायब्ला नुबायदि मासे गोसोम गाबनि फिसा बोरमा फानथिआ आंनि खाथियाव गसंनानै दड । खाथियाव बिनि बिगुमा एबा बिमाखौबो नुनो मोनाखैमोन । बोरमा फिसाआ आंखौ खनले खनले सौखांबाय थादोंमोन । आंनि फेन सिफिनिफ्राय हाइजेंनि बिस्कुत दिहुननानै बिनो जाहोनायसै । बिस्कुतखौ जोबोर गोजोनै जाखांनानै बियो आंनि साखाथियावनो उन्दुनानै गांसो सावलेबाय थानायसै । दसे उनाव आं थांफिननो गसडो अब्ला बोरमा फिसायाबो आंनि उन उन फैफानो हमदोंमोन । जेब्ला आं नथिंजाय फैयो बिबो आंजों उन उन फैफाथारो । बिनि थेंगन गन आथिंआ नाथाय खम्फिदोंमोन ।

बियो आंनि साखाथि फाखाथि जेरैबो बारदिंग्लायनो हमदोंमोन अब्ला आं बिखौ नआव थांफिननो थाखाय खावलायदोंमोन । नाथाय आंनि उन उन स्राय स्राय बोहैनाय दैमासिम फैफाथारो । आं मिथिगौमोनदि बिनि थोर थोर खम्फिनाय आथिंआ स्राय स्राय बोहैनाय दैनि दाहाराव रोन्जिनाय नडामोन, बेखायनो आं बिखौ आंनि फाफिलियाव दैखांनानै दैमाखौ बारहोनायसै । जेब्ला आं बिखौ गाहायाव एंख्लायो अब्लाबो बियो गावनि मोदोमखौ आंनि आथिडऱवसो हुब्लिनरबाय थादोंमोन । बे फिसा बोरमा फानथिखौ गारबोनो थाखाय आं नथिंजाय गोख्रैयै थाबाय लांदोंमोन नाथाय बेनि आथिडऱ खम्फिया लासिनो मालाबानो आंनि उन उन खारबोनानै ननि गेटआवसो गसंथे फैबाय ।

बिखौ सिडाव लांनानै आबौनो जासि हैनायनि अनगायै आंहा जेबो राहा गैयामोन । बे समाव आबैआ ननि खामसालिआव गसंनानै दडमोन आरो आंखौ बुंनयसै दि बिनि अनगायै जेबो जुनारफोर गैबावलामोन नामा ? बे नआव जेबो जुनार दा लाबोसै दा लाबोसै होननानै बुंन्लाबो नोंसोर लाबोबाय थायो । आबैनि बे बोरबनायखौ आं गोरलैयैनो बुजिनो हादोंमोन मानोना साननैसो सिगाडाव जोंनि फिसि जानाय ट'ट' मुंनि मासे मोखाया नख'रनि आइजें आइलाफोरखौ सिफायनानै थेर-बेथेर फोरसा-फोरसि खालामदोंमोन । बिनि अनगायैबो न'नि दरजाफोरनि पर्दाफोरखौबो बिसिफ्लेजोबदोंमोन । आबौआनो नाथाय गोबां रोखोम रोखोम जुनारफोरखौ लाबोबाय थायोमोन । बे बुरमाखौ आं लाबोफादों होननानै आबैआ गमामायैनो मिथिनायमोनब्ला नआव दोना लासिनो आंखौ हष्टेलावसो थांहोगौमोन ।

आबौआ सानै हयै बे बोरमाखौ आं बायनानैसो लाबोदों होननानै बुंन लानायसै मानोना बियो गिदिर देरोब्ला फिसा आजायगोन आरो गायखेरबो होगोन । बिदि होननानै आबौआ खिन्थाबावो दि, बे गाइखेरजों आबैनि सानाय बेरामाबो हामलांगोन ।



आबैआ मिथिखागौमोन दि बे बोरमायाथ' दानो गायखेर होया अब्लाबो नाथाय आबौनि बे बुंनाय बाश्राया आबैनि गोसोखौ गुरै खालामनो हादोंमोन। आंनि बे बोरमनि मुंखौ गुख्रैयै तिंकरबेल दोननाय जानायसै। गमामायैनो तिंकरबेलआ गोबां रां आर्जिनो हानायसै। बियो गेलेयै गेलेयैनो मोनसे बेंखननि गेजेराव जेब्ला बाज्जलबाय थायो अब्ला अरैबायदि नुनो मोनोदि जेन'बा बिनि आथिंआव स्पिंसो दडः। बेखौ अननानैनो आं बिनि गोदोनायाव गंसे गांग्रिं खानानै होदोंमोन जाहाथे बियो बबेयाव दडः आं बेखौ गोरलैयैनो मिथिनो हायो।

फुंडाव बेरायनायखौ बियो जोबोर मोजां मोनोमोन। बोरैबा जायोब्ला सैमानि जायगायाव बिखौ लांफानायानो गाहामसिन होनजायो। मानो होनोब्ला बियो हरै ओरै खारदिला बाया आरो मावजि, लामानि सैमा एबा जुनारफोरजों खारदेरला बायामोन। बिहा मोनसेल' हुदा दडःमोनदि बियो जाबाय सिख्रिखौ होसोयोमोन। सिख्रिखौ होसो होसो बियो हाखराव सिनथायनो गाब्रलांफ्रायोमोन।

बोरमाया नाथाय जोबोर थाब थाब देरोमोन। गुबुन जुनारफोरनि रुजुनायाव जॉनि टिंकरआ जोबोर थाबैनो देरनो हमदोंमोन। देरनाय लोगो लोगो बिनि




खरआवबो जरासे गं रज'नो हमबाय। बिनि उखैनायफ्राबो बांलांनो हमबायमोन। गोथां गोथां गांसो हाग्रा जानो बियो जोबोर मोजां मोनोमोन। बेफोर गासिबो आबौनि बारियावनो दड-जोबोमोन।

सानसेखालि फुडाव नुबाय दि आबैनि मैगं आबादआ गासेबो बुरमाजों जाग्लि जाजोबबायमोन। बिखौ नुनानै आबौजों आंजों गोख्रैयैनो आबैनो खिन्थानायसै दि मोनायाव सोरनिबा मोसौआ बारियाव हाबदों जानो हागौ। नाथाय आबैआ जेबो बुडा लासिनो सिरि थानायसै मानोना बियो दायनिगिरिखौ मिथिखागौमोन। सानसेखालि जोमै गैयै लासिनो अखा हानायबादि मोनसे खैफोदआ नुजाफैनायसै। टिंकरआ जेब्लाबो सोरखौबा नडा सोरखौबा गंजों सौख्लायोमोन। बिनि थाखाय थालिर फानग्रा, मालि, लाइजाम रानग्रा, फिथाइ-सामथाइ फानग्रा बिसोरनि जेब्लाबो अजद मोनबाय थानायमोन। नाथाय मै बादि समायना अनथाव-बाथाव टिंकरआ बे बादिखौ मावनो हाथावआमोन।

जौनि मादै सासेआ जेब्ला जौनाव बेरायफैयो अब्लासो बाध्राया गाज्रि जायो। टाबआव दोननाय बिबारखौ मादैआ गंनानै नायबाय थार्दोंमोन अब्ला टिंकरआ सन्देह जानायसै दि आं जानो मोजां मोननाय बे बिबारखौ बियो खासिगोन नामा? गाव मोजां मोननाय बिबारखौ खाजानो गिनानै टिंकरआ उनथिंजायनिफ्राय फैनानै मादैखौ सौख्रांफैनायसै। मादै माबेला बे बादि सौख्रांजानानै बे जाथाइखौ गोरलैयै लानो हायाखैमोन। जौजों थाफानो मोननाया टिंकरनि थाखाय बेनो जोबथा दिनमोन।

टिंकरखौ थोंजोंडै हाथाइयाव फानहैनो थाखाय आबौआ जौनि ओंखाम संग्राखौ थिनदोंमोन। बुंवावदोंमोन दि जायनो बायनो सोंजेनो, जायखि बेसेन मोना बिनोनो फाननानै फै।



दरजायाव गसंनानै टिंकरखौ लांनायखौ आं नायहरबायल' थादोंमोन । अब्ला बोरमाया मे मे होननानै सान्दोंमोन खोमा दि दिनै आं मानो बिजों फैफानांखो? आं बिखौल' आखाइजों फाव खालामनानै थांदो होन्नानै बुंदोंमोन आरो गोसोजों गोसो हासथायदोंमोन दि जाहाथे बियो मोजां बिगोमाखौ मोनहैफिनो ।

टिंकरखौ फानबोबाय होन्नानै ओंखाम संग्राया खिनथा फैनायसै । नाथाय दसे उनाव जेब्ला इसिंआव बिजों आंजौल' दडमोन अब्ला बियो आंनो स्रोदयै खिनथाखोमानायसै दि बे बोरमाखौ गावनो बायदों आरो हाथायसालिनि उनथिंजाय थानाय गावनि गोदान नआव थानानै जेब्लानो गोसो जायो अब्लानो टिंकरजों लोगो हमहैनो हागोन ।

सम सम आं टिंकरखौ लोगो हमनो थाडोमोन आरो सानसेखालि आं बिखौ ओंखाम संग्राजों लोगोसे नूनो मोनदोंमोन । टिंकरआ गोबां गाइखेर होग्रा बोरमा होन्नानै फोरमान जाबाय । ओंखाम संग्रानि नख'रा बेखौ मोन्नानै जोबोर खुसि थारमोन । बयजोंबो बियो मोजाडैःनो थायोमोन नाथाय जायनो बिखौ बांद्राय गंहाबनानै नायोमोन बेखौनो सौखाडोमोन ।





आबौनि मोसा

सा भारतनि देह'रानि मोनसे ताराय मुनि हाग्राबारि दडमोन। बेहाय आबौआ मैहुर खालामनो थांनाय समाव मासे मोसा फिसाखौ मोनदोंमोन। आबौआ देह'रायावनो थायोमोन आरो बे हाग्राजों जोबोर मोजां सोमोन्दो दडमोन। बेखायनो माखासे मैहुरारिफोरा बिखौ हाग्रायाव लांफायोमोन।

हाग्रा गेजेरनि लामाजों थांबाय थानायावनो ससे गोजानाव सहैब्ला आबौआ फाखि बिफां सिंडाव थाखोमानानै थानाय जिदाइन इन्सि गोलाव मासे मोसा फिसाखौ मोनदोंमोन, जानो हागौ बिनि बिमाया बेखौ नागार लांदोंमोन। मैहुर खालाम खांनायनि उनाव आबौआ बिखौ लानानै फैदोंमोन। आबौआ बिनि मुंखौ टिम'थि दोनदोंमोन।

ननि जिरायग्रा खथायाव थाबाय थानो टिम'थिआ जोबोर मोजां मोनोमोन। बेयाव बियो मालाबा मालाबा सफा सियारआव दलरै उन्दुनानै थायोमोन आरो जेब्ला बिखौ बे जायगानिफ्राय होखारनो नागिरो अब्ला बियो नेरखाडोमोन। जायनो बिजों गेलेफायोमोन अब्ला टिम'थिआ बिनि उनाव थाखोमानो मोजां मोनोमोन। बेखायनो आं जेब्ला आबौमोननि नआव थाडो अब्ला गेलेनानै बिजों जोबोर मोजां मोनजायोमोन। लाजिस्लु लाजिस्लु, गंस्रो गंस्रो, लासै लासैयै बियो आंनि खाथिआव मानबायबोनो हमो आरो बियो हरखाबैनो आंनि आथिंखौ दांहरोमोन। बिनि उनाव खुसिजोंनो उन्दोनानै आंनि आथिंखौ अरलुन-अरलान खालामफ्लानानै गेलेनो हमो।

समजों लोगोसे बियो देरबोनो हमदोंमोन आरो सिखारि सैमाबादि जाबोदोंमोन, जेब्ला आं सानसेखालि देह'रायाव बेरायनो बिखौ लोगोआव लांफादोंमोन अब्ला मानसिफोरा लामायाव नुनाय लोगो लोगो गोजानजों एरायखादोंमोन। मोनायाव जेब्ला उन्दुयौ बियो जौनि ओंखाम संग्रा महमुदिनि खथायाव उन्दुनानै थानायमोन। आबौआ बुंदोंमोन, “मालाबा जों महमुदिनि बिसनायाव (एमाव) टिम'थिखौल' नुनो मोनगोन।”

जेब्ला टिम'थिआ द'दाननि बैसौ जायो अब्ला बियो बांसिन बायगर जानो हमबायमोन। गोबां समावनो बिखौ लहानि जिनजिरिजोंसो खाबथानानै दोननांगौ जायोमोन। नख'रनि

गासिबो सुबुडा बनि सायाव फोथायनाय गैया जालांदोंमोन आरो जेब्ला बियो महमुदनि साखाथि-फाखाथि गिथाव-बाथाव आखलजों गिदिंबाय थानो हमो अब्ला आबौआ टिम'थिखौ सिरियाखाना (जुनारसालि) याव दोनहैनो थि खालामनायसै।

जानोहागौ नैजौ कि:मि: गोजानाव थानाय बयनिखुइबो खाथिसिन सिरियाखाना (जुनारसालि) लखनऊआवमोन। आबौआ गावनि आरो टिम'थिनि थाखाय सेथि थाखो दाबायाव रेलनि टिकिट बुकिं खालामनानै थानायसै। लखनऊ सिरियाखानानि बेंगिरिफोरा मोसाखौ मोन्नानै जोबोर मोजां मोन्दोंमोन।

द'दानसिमहालागै टिम'थिखौ नायहैनो थाखाय आबौआ समखौनो मोनाखैमोन। द'दाननि उनाव आबौ आरो आबैआ आलासि जाहैदोंमोन। आबैआ सिरियाखानायाव (जुनारसालिआव) थानानै थोंजोंयै टिम'थिनि फानजारियाव स'हैदोंमोन। अब्ला फानजारियाव मासे गुफुं आरो समायना आगरगोनां मोसाया गोलांनानै दडमोन। आबौआ "हेल्ल" टिम'थि" होन्नानै गाबज्रि हैदोंमोन।


बनि उनाव रिलिआव गाखोनानै बियो फानजारिनि सेराव गावनि आखाइखौ सोहरनायसै। टिम'थिआ सिगां बोनायसै आरो आबौनो गावनि खर'खौ बिलिर होनायसै।



आबौआ टिम'थिखौ जोबोर अन्नायजों बिलिरबाय थानायसै आरो बिनि खोमायाव एवथुबाय थादोंमोन। जेब्ला टिम'थिआ नेरखांदोंमोन अब्ला आबौआ बिनि खुगायाव हमनानै बिलिरोमोन। थिक बेबादिनो टिम'थिआ आबौजों थाफानो हमदोंमोन आरो गोजोनहोनो नाजादोंमोन।

टिम'थिआ आबौनि आखाइखौ सोलाबाय थादोंमोन, नाथाय जेब्ला साखाथिनि लखाया बिखौ नेरहरदोंमोन अब्ला बियो गिनानै फावसाय लांनायसै। नाथाय जेब्ला आबौआ बै लखाखौ माबा बुंनानै सिगिहरफिनो अब्ला टिम'थिआ फैफिन्नानै आबौनि आखाइखौ सोलाफिननो हमनायसै।

खनले खनले लखाआ फानजारिसिनिफ्रायनो टिम'थिनि सायाव गाग्लोबनो नागिरो आरो टिम'थिआबो खेबफ्रामावबो लासैयै दाबसे खनायाव थाहैयोमोन। गोबां मानसियानो बिसोरनि बे गोमोथाव अनलायनायखौ नायनो थाखाय ज' जाफैदोंमोन। अब्लानो सासे गार्डआ फैनानै आबौखौ बुंनायसै-बियो मा खालामनाय जादोंफालाय? आबौआ बुंनायसै दि “आं टिम'थिजों रायज्जायगासिनो दड, मा नोंथाडा बेहाय गैयामोन नामा जेब्ला आं टिम'थिखौ द'दाननि सिगां दोनफैदोंमोन?”





सिरियाखानानि गर्दआ गोमोनानै बुंदोमोन, गोबां समसिम आं बेहाय गैयामोन ।
नोंथाडा रायज्जायबाय था होन्नानै बिथाडा बुंवावनायसै । आं गावनो बे मोसाखौ मालाबाबो
दांफेरनो हायाखै । बिखौ आं जेब्लाबो रागा रागाल' नुदोमोन ।

बा मिनिटहालागै आबौआ टिम'थिखौ बिलिरबाय थादोमोन अब्लानो आबौआ
गुबुन सासे गिहाबनानै थानाय गर्दखौ नायसनदोमोन । आबौआ बिखौ सिनायनो हानायसै ।
बिनो बै गर्दमोन जायसमाव टिम'थिखौ दोनफैदोमोन । आबौआ सोनायसै मा नों आंखौ
सिनायनो हादोना ? नोंथाडा मानो टिम'थिखौ बे गाज्जि बायगर लख्रानि जानगार गुबुन
फानजारियाव दोनहैया फालाय ?

“नाथाय मानगोनां”, गर्दआ गिनायजों बुंवाय बियो नोंथानि मोसा नडा । आं
मिथिखागौदि बे मोसाआ आंनि नडा नाथाय नडाब्लाबो आंनि बोसोनखौथ' नोंथाडा
लानो हायो ?

गर्दआ अब्ला बुंवाय, आंहा नोंथानि मोसाखौ जोबोर मोजाडै गोसोआव दड ।
अखाफोर दाननैनि सिगां नोंथानि मोसाया थैदोमोन ।

आबौआ सोमोनांनानै बुंवाय, थैबाय ?

नंगौ सार, बियो निम'निया जानानै थैदों । नै बे मोसाया थानाय दानावसो
जाहारनिफ्राय हमनानै लाबोनाय आरो बियो जोबोर गिथाव-बाथावथार ।

मोसाया आब्लासिमहालागैबो आबौनि आखाइखौ जोबोर अन्नायजों सोलागासिनो
दडमोन । आबौआ थाबैनो गावनि आखाइखौ फानजारि सिनिफ्राय बोख'नायसै । बिनि
उनाव मोसानि खाथियाव गावनि खुगाखौ लांनानै बुंनायसै, “गुड नाइट टिम'थि” गर्दआ
सोमोनानै नायफ्रांवाय थानायसै आरो आबौआ सिरियाखानानिफ्राय गोख्रैयै औंखारलांनायसै ।





मुकेशआ जुनादसालि लुदों

दिल्लीआव बेरायहैनाय समाव मुकेशआ गावनि बिमा बिफाजों लोगोसे जुनादसालियाव थादोंमोन। बियो गोबां गाबनि दाउ, जिबौ, मोखा, चिमपानजी आरो मैखोमै सिंह, मोसा, लखा बायदि रोखोमनि जुनारफोरखौ नुनानै रंजाखांदोंमोन। बियो फिसा नोगोर देहरायाव थायोमोन जेराव गंसेबो जुनादसालि गैयामोन। नआव सौहैनाय लोगो लोगोनो बियो गंसे जुनादसालि लुनो थाखाय थि खामनायसै।

अखानायै फुडाव फुंनि जामुं जानाय समाव बियो बुंनायसै दि, “आं गंसे जुनादसालि लुनो सानदों।”

नाथाय बिनि बिनानाव दलिआ बुंनायसै, “नोंहाथ’ दाउ एबा जुनारफ्रानो गैजारोडा।”

मुकेशआ बुंबाय, “आं माखासेखौ लाबोगोन। जुनादसालिनि ओंथियाथ’ जाबाय जुनारफोरखौ ज’ खालामनाय।”

बियो खामसालिनि गुफुर इनजुरखौ मोजाडै नायफ्लांबाय थादोंमोन जेराव मासे माइनावआ थामफैखौ होसोबाय थादोंमोन। फुंनि जामुं जाखांनायनि उनाव मुकेशआ बै माइनावखौ हमनो नाजानायसै। नाथाय माइनावआ जेरै नुदों बेबादि नडामोन। बियो बिनिखुइ बांसिन सोलो गोनांमोन आरो बियो जेल्बाबो गोजान गोजान सिगांलांबाय थादोंमोन।

नसुंसेरनि तेजुआ फैनानै बुंफैनायसै दि, “माइनावखौ बेबादि हमनो हाया।”

मुकेशआ बुंबाय, “नों हमनानै हो।”

तेजुआ बारिनिफ्राय गन गंसे लानानै फैनायसै आरो बिखौ गनजों एख्लायनानै मोनसे जुथानि खौथायाव सोनायसै। मुकेशआ बुंबाय, नों आंनि जुनादसालिनि गाहाइ नेग्रा जागोन। बिनि दसे उनावनो मुकेशआ उनथिंजायनि बारियाव थांनानै तारजों जे हेबनानै मोनसे जेवरा गोनां ख’ दुमनो लानायसै। बे तारनि बान्दोलखौ बियो दाउ गन्द्रायाव मोनदोंमोन। तेजुआ सोंनायसै दि, जोंनि जुनादसालियाव आरो मा मा जुनार थाबावगोन? “जोंनो माइनावनि अनगायैबो गोबां जुनार नांबावगोन।”

मुकेशआ बुंबाय, “नोंसिनि आबौनि बाथ’ दाउ।”

तेजुआ बुंबाय, “बाथ्रायाथ’ गाहामानो। “नाथाय आं फोथायादि आबौआ गावनि बाथ’खौ जौनो हरथ’गोन। नोंथ’ मिथखागौदि बे बाथ’आ धोरोमसुला आरो गोबां रोखोमनि आरज मेथाइ खोनासंहोयो।”

मुकेशआ बुंनायसै “अब्लाथ’ साबसिनसो जाबावबाय, मानसिफोरा गोबां नायफैगोन आरो रांबो खामायनो हागोन। तेजुआ अब्ला बुंनायसै, नों थिकखौनो बुंदों, जों जायखिजाया राहायैब्लाबो बाथ’खौ लाबोनांगोन। मुकेशआ बुंनायसै, आरो आंनि सैमायालाय? बिबोथ’ जोबोर गिलु-बालुथार।”



“नाथाय आंनि सैमाया हाग्रानिसो।”

“बिनि गाबा गोसोम आरो मेगना गोमो गोमोमोन। बेबादि सैमा जेरावबो गैया।”

ओरैनोथ’ मुकेशनि सैमाआ गोबां समाव खामसालियावसो उन्दोबाय थायोमोन। बेखौ खोनानानै बियो खर’खौ थिखांनायसै आरो गोमो मेगनजों जागोन होननानै थिफाय हरनायसै। तेजुआ बुंनायसै, ‘बिहाथ’ जन्डिस गोनांसो।”

मुकेशआ अब्ला बुंबाय, “नडा बिहा जन्डिस जायाखै, बिनि मेगना उन्दैनिफ्रायनो गोमोखा।”

जोबोर मोजां, तेजुआ बुंनायसै। बिदिब्लाथ’ जोंहा दा मासे माइनाव, मासे बाथ’ आरो मासे मेगन गोमो सैमा मोनबाय। मुकेशआ सोंनासै, नोंसिनि आब’नाव मासे गुफुर सेसा दडः मा बेखौ जोंनो हरगोन नामा? तेजुआ इसे गोनो गोथो जानानै बुंनायसै, भाराफोरसो हरबायबायगोन नामा। मुकेशआ बुंबाय, नायनायनोसै, बिदिब्ला आरोबाव सितारामनि गाद’खौबो जों मोननो हागौ। सीताराम धबीनि फिसाआ नख’र नख’रनिफ्राय गाद’जों जि लांलाय लाबोलाय खालामोमोन।

तेजुआ सोंनायसै, मा गमामायैनो नोंनो गाद’खौ नांमारगौ नामा?

मानो नाडा? बियो हाग्रानि मासे गाद’मोन तेजुआ बुंबाय, आं हाग्रानि गाद’खौसो खोनादोंमोन नाथाय-बिनि सोमोनदै मिथियामोन। ओं, हाग्रानि गाद’, ननि गाद’आरो गराय फिसा जातआ मोनसे फोलेरनिनो जुनार। तेजुआ बुंबाय, मानो नडा जानो? नों बेवहाय गोसोम गोलाव दागो फोनदेरोब्लानोथ’ बियो जेब्रा जाबाय।

मुकेशआ बुंनायसै, बियो गाहाम हाबा जानाय नडा। जोंथ’ गुबै जुनादसालिखौसो बानायनो सानदों। शनिबार खालि सानसुआव खानथाल बिफाडाव गंसे गिदिर चाइनबर्ड आलाइनानै दोननाय जानायसै। उन्दै उन्दैफोरखौ बेसेन नाडै आरो गिदिर फोरखौ 50 फैसानि टिकिट लानानै हाबनो थाखाय गनायथि होनाय जागोन। ककी आरो ड’लिआ टिकिट फानगासिनो दडःमोन। जुनादसालि नायनो लुबैनाय मानसिफोर आरो बिमा बिफाफोरनो टिकिटखौ फाननो थाखाय नआवनो दोन्नाय जादोंमोन। मुकेश आरो बिनि लोगोफोरा आलादा आलादा गन्द्रा आरो माफ्रामबो जुनारखौ मोजाडै सिनायनो हानायनि थाखाय मुं बिलाइ दोन्नाय जादों।

सिगांथारनि गोसो बोनो हानाय थावनिया जाबाय गंसे खोबनानै दोन्नाय जोबोर गिदिर फानजारि जेरावनोखि ननि माइनावफोरखौ बासिनानै आलादायै दोन्नाय जादोंमोन। बिसोर इसे लोरबांमोन जेरावनोखि बिसोरनो नांगौ रोखोमनि थोजासे एमफौ एनला जाहोदोंमोन।

नैथि गन्द्रायाव गुफुर सेसाखौ दोत्राय जादोंमोन। उननि गन्द्रायाव मुकेशनि सैमामोन। मुकेशनि सैमा दोत्राय गन्द्रायाव लिरनानै दोत्राय जादोंमोन 'मेगन गोमो सैमा।' बिनि गोमो मेगना क'कीनि गिख' सेसानि गलापी मेगनखौ मुहिहोनो नाजादोंमोन। सैमाया गावनि सिगांनि आधिंजों हाखौ खुरै खुरै सेसानि गन्द्रायाव हाबहैनो नाजादोंमोन।

सितारामनि गाद' फिसाखौ थाइजौ बिफाडाव दुरुंजों खानानै दोनदोंमोन। बिफाडाव गंसे फिसा गाजोल दोनानै थकथा आलाइनानै दोत्राय जादोंमोन आरो बेवहाय लिरदोंमोन 'लैथो सेरनि बालाबारियाव थानाय हाग्रानि गाद' फोलेर बादिब्लाथ' बिहा हाग्रानि गाद'जों सोमोन्दो थानांगौ नाथाय गोबाडानो बिखौ जि सुग्रा ध'बानि गाद' होत्रानैसो मिथिगौमोन। बियो खनले खनले खेवनानै खारलानो नाजादोंमोन। औरैबादि नुनायमोनदि बिहा जानायनि जेन सम जाबाय।

बैहाय मासे हांसोबो दडमोन। जानोहागौ बियो रावनिबो नडामोन। बेहाय मासे फिसा मोसौ गाइबो दडमोन जाय गावनो बबेनिफ्रायबा लामा आन्दायनानै सौफैदोंमोन। नाथाय बयनिखुइबो मुहिनांथावआ बाथ'मोन। बियो गले गले गुबुन गुबुन रोखोमनि मोनथाम आरज गावनो रोंगौमोन। थाबैनो बिनि खाथिआव गोबां बिमा-बिफाफोरा ज' जानो हमनायसै आरो बिखौ बाखोनायनायसै, बेबादि बाथ'खौ गावसिनावनो थाजानो लुबैदोंमोन। दुखु नांथाव बाथ्रा दि तेजु आरु क'किनि बिबैआ मन्दिरआव थानो थाखाय बे सानखौनो सायख'दोंमोन। बेखायनो बिसोर बाथ'खौ लानानै दावराव-दावसि जानायखौ मिथियामोन।

जेब्ला मुकेश आरो तेजुआ बेरायनो फैनाय मानसिफोरजों लोगोसे जुनादसालियाव हाग्रानि सैमा आरो हाग्रानि गाद'नि सोमोन्दै खिनथाबाय थादोंमोन अब्ला क'कि आरो ड'लिआ टिकिट फानानै गोबां रां खामायबायमोन। जानो हागौ बिसोर जि रांसो बुथुमनो हाबायमोन आरो फानबावनो हागोन होननानै मिजिं खालामबावदोंमोन। बे समावनो जुनादसालियाव जेंना नुजानायसै।


गोमो मेगननि सैमाया गावनि गन्द्रानि हाखौ खुरनानै सेसानि गन्द्रायाव हाबहैनो नाजादोंमोन।

सेसाया गिनानै सोरगिदिं खारदिंबाय थादोंमोन। बे समावनो गाद'आबो दुरुंखौ बोस'नो हानायसै। दुरुंखौ बोस'नानै नायग्राफोरनि गेजेरजों गोख्रैयै नथिं खारलानायसै।

क'किआ होसिखावनानै सेसाखौ रैखा खालामनो खारलानायसै आरो गोख्रैनो बिखौ खैफोद गैयाजासे गावनि बिखायाव बोजबनानै लानायसै। गोसो बायनाय सैमाया दा हांसोखौ हमनो नाजानायसै। हांसोआ जोबथे जानाय फानजारियाव गोजौथिं बिरखौनायसै,

नाथाय सैमाया गसिबो मायनावफोरखौ लेथेर-फेथेर खालामनानै बिनि सायाव गाग्लोबनो हमनायसै। बेफोर गसिबो जेंना-जेंगोनानि गेजेराव रावबो बिनि सायाव नोजोर होनो रोडाखिसै दि बाथ'नि फानजारिआ गोवनानै दड। रंजानानै बाथ'आ गां बुब्राब बुब्राब बाहेरायाव ओंखार बोनायसै आरो बिरलांनायसै।

ड'लिआ होसिखावबाय, बाथ'आ बिरलांबाय, बाथ'आ बिरलांबाय आरो थुबुर जानाय नायग्राफोर आरो गथ'फोरा गसिबो सिरि थाहाबनायसै। सैमायाबो सोंनायखौ



दोनथ'बाय, आबैनि आरज खननो गोरों बाथ'आबो बिरलांबाय। दा बिसोर आबैजों माबोरै मोगा-मोगि जागोन। होंगो दोंगोआ गोख्रैनो जोबनायसै। रावबो लुबैयाख्रैमोन दि जाथाइनि दायनि गिरिआ बिसोरनो जायख्रौ तेजु आरो ककीआ नआव फैनायनि उनाव मिथिफैगोन।

तेजुआ सोंबाय, दा जों मा खालामनाया मोजां?

मुकेशआ औरैबादि गिहाबदोंमोन दि बियो जेबोख्रौनो बुंनो हायाख्रैमोन। क'कीआ मोनसे सोलो खालामनायसै, आं सानो दि जों गुबुन बाथ' मोनफिनगोन, माबोरै?

“बेहाय दा जों जि रां खामायनायजों नों गोदान मासे बाथ'ख्रौ बायनो हागोन।”

बेबादिनो बिसोर फानजारिख्रौ लानानै गोख्रैयै हाथायथिं ओंखारलांबाय। बैहाय बिसोर लोगो लोगोनो सासे दाउ फानग्राख्रौ लोगो मोननायसै आरो बिबैनि बादि मासे बाथ'ख्रौ बायनानै



लाबोनायसै। बै मानसिया बिसोरनो फोथायनाय होदोंमोन दि बे बाथ'आ राव रायज्जायगोन
खि रायज्जायगोन।

लामाआव मुकेशआ बे बाथ्राखौ गनायनानै लादोंमोन। बियो नोंसिनि बिबैनि
बाथ'बादि नुयो नाथाय बेखि आर'ज गाबनो हागोन?

क'कीआ बुंबाय, हानाय नडा।

नाथाय जों बिखौ फोरोंनो हागोन।

तेजु आरो क'कीनि बिबैआ मेगन नोजोरआ बांद्राय नुयामोन बेखायनो बियो
सोलायनानै दोननाय बाथ'खौ नोजोर होनो हायाखैमोन। नाथाय बियो गोबां अजद
खालामदोंमोन दि, बाथ'आ दानिया आर'ज खननायखौ नागारबाय। आरो दा बियो
सुखुयै गारांजों दावराव खालामबाय थायो आरो एखनब्ला एखनब्ला रायोबो।

तेजुआ थाबैनो बे दुखु नांथाव हालोदखौ सोद्रायनो नाजानायसै। सानफ्रामबो
फुंडाव बाथ'नि खाथिआव थांनानै गले गले आर'खौ खनहैबाय थानायसै। माखासे
साननि उनाव बाथ'आ मोनसे आर'जखौ सोलोंनो हानायसै। बिबैआ खुसि जाफिननायसै।
बिनोल' दि बिनि बाथ'आ आर'ज मेथाइ रोजाबफिननो रोंबाय, आरोबाव तेजुआबो दा
आर'ज गाबनो सोलोंबाय।



